

四庫全書

集部

欽定四庫全書

集部

曝書亭集卷二十六至

詳校官庶吉士臣汪彥博

助教臣常循覆勘

總校官降調編修臣倉聖脉

校對官檢討臣盧遂

謄錄監生臣趙立榴

欽定四庫全書

曝書亭集卷二十六

翰林院檢討朱彝尊撰

詞三

江湖載酒集

下

百字令

彭城經漢高祖廟作

歌風亭長荆三楹遺廟斷垣摧棟芒碭雲霾銷已盡惟
見馬頭山擁逐鹿人亡斬蛇溝冷一片閒丘隴綵幡斜

挂綠揚絲裏飄動 贏得割據羣雄六朝五季各自誇
龍種魂魄千秋還此地人甌野雞誰共社古粉榆村遙
巫覡孰管神迎送行人憑弔看來終勝劉仲

水龍吟

謁張子房祠

當年博浪金椎惜乎不中秦皇帝咸陽大索下邳亡命
全身非易縱漢當興使韓城在肯臣劉季算論功三傑
封留萬戶都未是平生意 遺廟彭城舊里有蒼苔斷
碑橫地千盤驛路滿山楓葉一灣河水滄海人歸圮橋

石香古牆空閉悵蕭蕭白髮經過掣涕向斜陽裏

江南好

江南好舊事試重論平底畫船桃葉渡小樓疎雨杏花
村何處不消魂

同作

無錫嚴繩孫蓀友

江南好最好石頭城細雨溼回磯燕小暖風扶上紙
爲輕遮莫近清明

金縷曲

初夏

誰在紗牕語是梁間雙燕多愁惜春歸去早有田田青
荷葉占斷板橋西路聽半部新添蛙鼓小白鶩紅都不
見但悵悵門巷吹香絮綠陰重已如許 花源豈是重
來誤尚依然倚杏雕闌笑桃朱戶隔院秋千看盡拆過
了幾番踈雨知永日簸錢何處午夢初回人定倦料無
心肯到閒庭宇空搔首獨延佇

邁陂塘

答沈融谷即送其游皖口

記分襟秋河射角相逢今已春序草芽香徑看猶淺早

有落梅無數桃葉渡指鴈齒橋西舊是中山墅留君且
住喚紅友傳杯青猿翦燭伴我夜深語 勞生事白髮
蕭閒未許軟塵翻又催去鍾山照眼青青在雲壑笑人
何苦攜手步那得共春潮皖口揚舲度沉吟歸路算二
頃湖田一絲釣艇肯負綠蓑雨

又用前韻題查韜荒詞集

對層檐沉沉春酌驚心屢換時序浮萍蹤跡如相避飛
夢天涯難數芳草渡尋不到斷橋曲港龍山墅白門此

住望塔火林梢江樓鴈底莫共小牕語
新詞好沈鮑
同時矜許朗吟且漫攜去別裁懊惱迴腸曲轉覺良工
心苦邀笛步試喚取雙鬟綽板樽前度迢迢紫路計秋
水鱸香歸期未晚同聽豆花雨

又題顧茂倫雪灘濯足圖圖為松陵女子沈關
關所繡

更無須調鉛吮粉神針繡出天巧江村自是科頭慣不
用雨中風帽木葉少向獨樹疎陰添个漁童小三高絕
倒笑淺菊莎邊閒鷗磯畔千載有同調
蓬門在深徑

客來頻埽東籬頗厭枯槁香山詩卷牛腰重六十平頭
未老貧也好那似我黃塵六月長安道秋風舉擢問斜
日鱸香卜鄰定許歸期已先料

又自桃葉渡泛舟暮抵浦口雨宿村店漫賦

憶歸時白門楊柳吹花糝滿香徑重來化作青萍子宛
似客游無定呼小艇擬有分桃根桃葉行相並雲廊藻
井枉費却臨流紅闌千百不見玉人凭西郊路十里
柔波如鏡石城高下殘景江豚多事頻吹浪只怕落潮

風猛斜又整信一葉舟輕幾幅蒲帆逞人家烟暝傍急
雨長蘆昏鐘古岸漁火隔牕冷

蝶戀花

送惠觀溪歸吳

人柳初眠嘶別騎婪尾杯乾送客還吳市春水一灣雙
塔寺中庭盡種相思子 俊侶銅駝游倦矣我亦扁舟
早晚成歸計試喚紅兒來樹底翻香小令樽前記

又

同繆天自再過柯翰周園亭

壓水藤牆敲石塢猶記霜深短檝經過處獨木小橋秋

葉舞倦紅不埽門前路
勝侶重攜穿竹語添結茅亭
心許沙鷗住日暝澄烟吹不去
夜涼滴作高梧露

柳梢青

題戴上舍惟意所擬圖

一道清谿露花開到紅板橋
西不借鞦韆輕無絃琴矮沒
骨山低石屏詩句堪題休閒了
秋容滿堤坐裏吟邊
三升畫榼兩個黃鸝

摸魚子

題李武曾灌園圖

護笆籬幾層茅屋為園期占三畝
蘆簾紙閣安排易更

要藥壚茶白溪雨後須記取上番移竹春栽柳扁舟計
就算夜韭辰瓜白鹽赤米一飯儘餬口 高堂健笑御
潘輿永晝好花隨意簪首疏泉帖石閒行處種樹熨童
都有悵別久對圖畫沉吟轉覺難分手客來尋否判踏
葉門邊繫船渚尾喚我作去去聲鄰叟

又題徐電發楓江漁父圖

怪烟波釣徒鄉里罟師如許青鬢浮家尚載閒書卷那
得身名全隱看一瞬把文賦詩篇樂府都經進披圖暗

晒怕白水撈鰕紅
闌鬪鴨與爾便無分
扁舟在蓑笠
綸竿未損攪人此日方寸清
江幾曲楓林下多少鱸魚
荻箭歸夢準挂十幅蒲帆
第四橋能認鉗中宿醞算八
測塘邊三高祠下讓我醉眠穩

同賦

宜興陳維崧其年

問何人生綃滑笏皴來寂歷如許孤篷幾扇西風底
滴盡五湖疎雨垂弱縷儘水蔓江蕪信意牽他住寄
聲魴鱖總來固欣然去還可喜知我是鷗鷺行藏

事不是如今纔悟浮名休再相誤人間多少金貂客
輸却綠蓑漁父誰喚渡早萬木酣霜紅到銷魂處林
林楓樹又遙襯蘆花搖晴織暝闌了半汀絮

又寄龔蘅圃

玉玲瓏閣前松石經過朱夏曾撫主人直待秋期近金
粟滿庭香雨新樂府早和徧蕢洲笛譜篋房句

謂青士
分虎也

竹垞小住笑我若歸時留君爛醉十日不教去西堂
冷孔翠應凋錦羽鹿麕高下騰距紅泥亭子方池外深

徑共誰延佇歲既暮想皖口鱖魚又好霑犀箸粉雲風
絮定吹到山樓叢梅凍雀把醞舊吟處

又贈吳天章

愛蓮洋無多行卷才華直恁明秀紛紛日下柴車至逸
藻吳郎希有李十九慣把汝詩篇三載藏懷袖今秋邂
逅便訪我城東涼波殘月曉度玉河柳 交期合不在
時時握手傾心偶共杯酒六街聽倦鼙鼓頗厭征衣
塵垢殘雪後待驅馬盧溝轉入孤山口蒼厓若白伴翠

竹黃梅香林守歲清興爾能否

又題王咸中石塢山房圖

最撩人東華塵土騎驢蹇還往酒徒幸有王郎在更
喜鈍翁無恙傾宿釀話黛色堯峰燈下吳音兩清詩迭
唱畫十里山容茅堂石塢隱隱露薇帳南歸好髣髴
高居仙掌栖負儘自蕭放解蘭焚艾非吾事只是海懷
霞想春水漲趁三月桃花也擬浮輕舫拖條竹杖約燒
筍林香焙茶風細來問五湖長

又同青士重訪晉賢時書樓落成訂詞綜付雕
刻有懷周士季青在吳興

小舟紆梧桐鄉裏重來花已三度主人一笑還開徑樹
蕙滋蘭無數留客住訝二仲依然未改當年侶別栽樂
府譜漁笛濱洲從今不按舊日草堂句 東園好百尺
高樓容與綠牕多少雲霧騰觚飛爵須吾輩禮法由來
無取相爾汝但只隔賢兄令弟添離緒來朝喚渡認酒
慢春橋茶檣夜柵便訪五亭去

蘭陵王

送宋員外牧仲視權贛州

禁街六嘶騎河橋一簇而今去嶺北天南忍對離樽便
催促雙旌行太速薄暝應投涿鹿吟鞭倚苑雪剛殘且
喜輕塵未吹麴 登艫九江曲算港截彭郎山問匡俗
層層翠浪峰迴複過十八灘水萬疊烟樹滿園蘭草無
數竹照廳事都綠 川陸舊游熟奈上下龍雲無計追
逐故人已分歸茅屋念翦燭深夜後期難卜楓林落月
定憶我夢斷續

浣溪沙

郊游聯句

出郭尋春已闌

宜興陳維崧其年

東風吹面不成寒

無錫秦松齡留仙

青村幾曲到西山

無錫嚴繩孫蓀友

並馬未須愁路遠

慈谿姜宸英西溪

看花且莫放杯

閒彙尊

人生別易會常難

長白成德容若

解連環

孫愷似使旋夜話用李十九韻

一燈涼雨話九都遠岫隔江蔥楚曾未滿三月王程訝

天角使星錦韉來去箏笛賓筵聽按徧黃裙樂部問香

杭酒釀七夕醉眠莞弱何處

郵籤定能記否但西東

指點玉羊金虎看拚擋藤笈陳編拂蠹字蟬魚載歸闌
暑多少詞人邀鏡面留題方絮待細論箕子流風漏聲
報五

祝英臺近

送張見陽令江華

錦鞍韉潭柘寺小榼載浮蟻纔及春游詩罷各分袂者
回聽雨荷邊團茵柳外奈一曲驪歌催起 幾千里試
看裊裊雙鳧銅章縮仙吏九面衡山二十四灘水定知
後夜相思寒亭煖谷吟不了晚紅餘翠

又送葉道子之官臨清衛

繡纏髮珠勒馬金印且懸肘勝作書生牕燭對紅豆計
程幾日郵籤玉鞭花外早繁杏香飄吟袖訪弟友只
在春草南池無煩夢魂又小榼三升太白酒樓酒相邀
露冕投壺東方千騎總一色春旗揚柳

又送翁武原之官黃州郡丞

嶽蓮雲關樹雨衣潤卸孤館記得班荆通潞短亭畔自
來南浦多愁西風易別把新鴈一繩吹斷再相見却

金少卿人ノ一
卷二十六
喜小郡黃州銅符許分縮盡說官閒蝴蝶繞書幔最憐
白露橫江青山如畫須夜夜綠樽教滿

又題丁雁水韜汝詞彙

史梅谿姜石帚澀體夢牕叟不事形摹秦七與黃九試
論北宋南唐偷聲比調誰得似玉昆金友章江口慣
自家宴樽前箏人記紅豆一東朋箋豈意入吾手只合
闌藥香時筒荷卷處次第付笛牀歌袖

燕山亭

七月十五夜同次友武曾融谷覃九集
認園竹屋

新雨橫街竹屋晚涼曲徑憐初埽深淺素瓷雪藕調冰
添撲半竿紅棗抹麗叢香問甚日吳船攜到秋早漾一
片明河免華圓了何用擲笛彈絲有骰子玲瓏玉舟
催倒檐牙罨網燈蕊捎蛾坐久露濃風小除却樽前數
詞客幾人同調諧笑渾不計過申犯卯

前題

平湖陸棻次友

垂了簾衣宛在米家書畫船牕坐楸局未停玉子聲
聲聽得賣花車過樹杪涼生吹幾葉絮雲低墮燈火

暈粉莉娟筠翠捎香妥
纔度天上秋期對月徑風
筵又陳瓜果南槽紅友內
樣青瓷今宵錦茵拚澆嘶
騎頻催便醉也欲留無那
歸可料寫入竹溪有我

前題

嘉興
李良年 武曾

燕月微黃纔到竹間淡著
江南影箔卷半牕露點涼
波書屋短於烟艇底問青
旗笑臘釀秋厨猶騰紅凝
闕古色甌香汝哥官定
還記舊雨梅邊又一葉飄
梧者番清景吳根夢去蟹
斲魚牀西風暗吹簞簟旅

話今宵都忘了五湖歸興更靜便挑盡燭花也肯

百字令

燕市逢李分虎

竹垞春雨悵早梅未放扁舟先發別後聞君浮皖口渺
渺波潮天未燕市經過相逢一笑逆旅征衫脫鄉園無
恙忽忽燈影中說正好青兕多才銅駝結伴按金荃
新闕跋扈飛揚須為爾忘却星星華髮座有能詩高三
十五勸飲杯中物酒闌起舞滿身都是明月

高適行三十五指罽

也園

滿江紅

送陸雲士宰江陰

仙令行時正柿葉翻紅
滿村易州酒菊英汎汎細注離
樽恰值蠲租新

詔下先教鳧舄指南雲問橋東青竹馬騎來凡幾羣
君
山翠堆縣門香灣白流樹根任垂簾清晝譜曲黃昏十里秋
花春桂粒一痕春水上河豚判明年小舫練江頭吟對君

綺羅香

贈沈融谷納妾

十斛量珠千絲結網枉說傾城難致
選得閒房略與柘

西相似書乍報翠羽枝邊人已
在玉梅檐底問攜來百
福香匳銀鈎多少衛娘字
龍吟新曲傳徧想出鴛鴦
浴處青銅無膩此日雙頭
只有粉蓮堪擬但點染一
鏡
春山漫商量五湖秋水也
須勝半萼燈花夜寒偎繡
被

融谷水龍吟詠白蓮有待浮萍
開處青銅無膩伴鴛鴦浴之句

風入松

送沈平萬之新安

蕭疎烟柳玉河潭殘月猶含
離人報道城東發趁新涼
卯酒初酣代馬頻嘶別路
吳縣須換征衫
歙州風物

舊曾語此去停驂烏丸素紙留題好繞清溪紫筍黃柑
心逐一繩飛雁秋深直到江南

臺城路

夏日同對巖蓀友西溟其年舟次見陽
飲容若淶水亭

一灣裂帛湖流遠沙堤恰環門徑岸劃青秧橋連皂莢
慣得游驄相並林淵錦鏡愛壓水虛亭翠螺遙映幾日
溫風藕花開徧鷺鷥頂不知何者是客醉眠無不可
有底心性研粉長牋翻香小曲比似江南風景看來也
勝只少片天斜樹頭帆影分我魚磯淺莎吟到暝

又 遶后洗妝樓

層闌不厭波光冷明霞遠捎魚尾細草含茸圓荷倚蓋
猶與舞衫相似揉藍片水曾簇蝶湔紅影蛾描翠錦石
秋花當時穩貼皂羅髻 春城幾番士女縱嬉游元夕
沙界烟寺黃面瞿曇白頭宮監也說千年遺事回心院
子問殿脚香泥可留蕭字懷古深情焚椒尋蠹紙

前題

長白
納蘭性德 客若

六宮佳麗誰曾見層臺尚臨芳渚露脚斜飛虹腰欲

斷荷葉未收殘雨添妝何處試問取雕籠雪衣分付
一鏡空濛鴛鴦拂破白蘋去相傳內家結束有怕
裝孤穩鞦韆闕古冷豔全消蒼苔玉匣翻出十眉遺
譜人間朝暮看臘粉亭西幾堆塵土只有花鈴縮風
深夜語

又 送葉井叔主事還南鄆

新霜未染香山葉黃花已開秋圃側帽風前囊萸酒畔
不分故人先去忽忽里語忍別了吳儂竟歸樊楚一色

魚天車湖爭似鶴湖住
蒲萄滿江綠漲愛翻鴉落雪
門對南浦訪舊襄陽題襟漢上芳草知誰同賦相思最
苦夢鴈影飛邊月明多處楊柳青青武昌何限樹

又 張鑑遠酌春堂席上賦

重門不改當年徑依然小山橫疊盧橘濃陰黃梅疎影
正好酌春時節筠車乍歇仗酒伴仍逢昔游能說點筆
淋漓瓜牛涎冷久磨滅 烏衣羣從少長況周郎陸弟
裙屐齊列金叵羅深玉屏風煖一曲紫雲歌徹樊川癡

絕只可惜而今鬢絲如雪暝色高城初筵無奈別

又送畊客南還

花南老屋花無數茅堂在花深處薑蔗閒塍竹梧小徑
吾亦板橋西住天涯倦旅忍負了芳辰又過殘暑底事
秋風罷官不去送人去江鄉舊時伴侶有山中猿鶴
沙上鷗鷺黃雀披絲玉鱸堆雪誰並船牕同煮離居最
苦判茸帽衝霜也尋歸路得及春游紫荷田醉舞

又送張漢瞻還嘉定題所畫望雲圖

秋來已是驚蕭瑟驪歌又聽燕館墜葉飄花飛蓬斷梗
長倚浮萍為伴雲搖雨散問底事忽忽便書驢券試驗
新圖應愁穿了望雲眼 百川灌河時節輕帆消幾日
放溜江岸賣履迎船牽罾喚渡一笑倚閭人健寒齋薄
飯須勝似銅街酒籌茶盃改歲相期洞庭游未晚

喜遷鶯

送丁雁水觀察度州

紅亭且住話十川天未舊游江路柳外吟羈酒邊征鐸
行到冶城瓜步一點峭帆風順遙指落霞南浦倚高閣

埽千年殘粉更題新句
津鼓又幾日三板輕船水驛
無重數螺子山南晴雷灘石飛作滿衣涼雨露寬行春
多暇肯訪薜蘿人否

謂冰叔也

莫惆悵盼月華金掌載同鷁

序

一枝花

送沈融谷宰來賓

露脚飄籬柱翠濕牽牛花吐一繩新鴈底幾行樹天未
郵籤數了還重數行徧衡湘路六槩衝烟烏蠻山在何
處
蚤戶兼龍戶多向竹棚頭住琴堂吟不盡荔支雨

晝便垂簾待夜月
修簫譜瘴鄉
休道苦須勝似淵明折
腰彭澤晨暮

同作

嚴繩孫

綠鬢銅章吏
藉甚東陽才子
拓西傳樂府滿燕市
合喚羅裙鷺管調
銀字忽漫牽絲去
亂水荒山迢迢六
七千里
木榭濃陰底
清簟踈簾廳事憑
題翡翠硯
白藤紙酒伴無人
蠶盃誰同醉
記取雙江外
第一是
梅邊莫忘小驛花使

又

海鹽 彭孫通 駿孫

小縣雷江口面而雞桐蛇柳微風香繡滿拂腰綬白
象雙趺也畫城門否官閣簾垂畫黑蝶癡肥應憐八
咏人瘦 莫怨分襟驟且盡離亭尊酒明霞拖淡墨
鴈飛候料得天南嘹唳聲希有多少連雲岫算兩地
相思仙鳧甚日來又

又

安丘 曹貞吉 升六

絕遠賓江路亂水輕舟頻渡瀟湘行欲盡瘴雲苦千

樹枕榔月黑鷓啼處到日清秋好
蚤戶鮫人滿城隅
看笑舞 椰子傾甘露照影紅蕉初吐
推琴小柱笏
訟庭暮龍目香中早暗送年華去
吟情應不減問寫
就蠻牋重寄昭王臺否

又

秀水 朱昆田 文盎

小雨沙頭店風埽濕雲齊
斂殘星猶挂樹四三點已
是離人怎得離愁減
萬里關河險過亂石重灘尖峰
漸露如劍 蠻女銅釵
篸比似西着南臉
山童爭喝

馬翠旗颭幾笏書齋定有新詞艷荔子輕紅染更椰
白蕉黃漫憶柘湖菱芡

邁陂塘

送尤展成還吳

話當年法曹姓字雲屏御墨曾染遂初堂下柴車促老
矣攜文三殿燒尾宴喜四載柯亭鎮日長相見緇塵偶
倦暫拚擋書籤丁寧才子紅藥守吟院扁舟好輸與
風流賀監紅亭十里交餞蛤蜊荻葉橫塘路葉葉酒旗
吹徧帆一點趁落木空江澹抹山平遠八門七堰喚記

曲桃根炙笙菱角憐取舊題扇

又

劉學正禹峰捐石鼓文見貽賦此志謝用姜白石體

問陳倉舊時獵碣橐駝燕市誰輦漏痕已失填金字猶
剩雨苔冰蘚松陰轉訝鎮日橋門靜鎖人未見劉郎放
卷慣著手摩挲巡檐步屨百過幾曾倦 閒無事翠餅
烏丸教碾硬黃繭紙摹徧遺余籀法真竒古屈曲珊瑚
枝軟興不淺寬巧匠裝池付與屏六扇紅絲小硯把馬
鄭紛綸周秦先後商略異同辨

又送陳雲銘入楚

數才名鷹揚河朔新來草檄能否萍蓬蹤跡何曾定只
是北燕南楚王粲賦道四望山川信美非吾土晴川密
樹問底事隨人一帆夏口又指漢陽渡 金臺畔漸少
銅駝俊侶憑誰共按簫譜蓴鱸稻蟹鄉亭亭卜了歸期
仍誤君此去料我亦無心更戀塵中組驪歌且住便解
纜今朝登艫後日不遠直沽路

清平樂

濕雲籠霧曉色空成暮空裏雪花風約住十月薊門飛
雨 歷頭簡到殘年客懷轉覺淒然滿地已無黃葉一
林惟有蒼烟

解佩令

送趙秋谷聯句

城頭畫鼓馬頭紅樹最無慘酒邊人去吳尊聽徧陽關

也未抵者番別苦嘉善魏坤禹平一程風一程涼雨吳

尊斷橋橫浦淺沙深塢翠鸞環好山無數海寧查慎

行夏重卸了朝衫換獨速莎衣醉舞坤勝東華滿鞞塵

土葵尊

生查子

晚行鄧州

密樹引長堤重露微涓墜惟聽浦禽喧漸入行人隊
隱隱望高城路出高城外初日未侵衣先閃寒鴉背

清平樂

齊河客舍

阿儂憊矣際曉還慵起今日郵籤翻百二猶是未晴天
氣茅檐土鏗人家酸風苦雨天涯回憶故園梅蕊不
知多少飛花

金縷曲

過外祖唐刺史廢園感舊作

歷歷猶能記小門開苔峰檻外板橋花底潮落蟳蜃爬
沙徧娟娟筠竿扶起自兵後曲池平矣倦柳衰荷都卷
盡況鴛鴦翠鬣紅魚尾渾不辨釣游地 土酥隴麥看
無際剝牆東午風茶板冷雲蕭寺去是黃童來白叟感
慨那禁對此但滿眼西州清淚斷陌踟躕歸騎晚歛殘
霞樓角孤城閉誰會我恁時意

清平樂

鷗塘生日

平安書到卜宅鷗塘早我亦安排歸計了沮溺耦耕也好
今年初度長安明年定是鄉關漁弟樵兄對酒雞
頭菱角堆盤

又贈歌者陳郎

偷聲減字且洗哀翁耳惱亂多情人欲死只有臨川曲
子陳郎巧囀歌喉尊前倍覺風流一霎塗妝縮髻十
三十四丫頭

又題吳中女子呂文安畫

深閨暇日偶仿王郎筆小字親題無氣力殺粉調鉛第
一圓珠斛得誰家香車遠隔天涯陌上依然柳色門
前何處桃花

金縷曲

題查浦書屋圖

馬疇村南渡趁輕帆雙峰寺外遠烟平楚橫漲橋邊鵝
鴨鬧認得苔磯蔬圃有點點遙岑遮戶只恨牆東書屋
少慣迎賓榻下莎廳住秋香滿小山樹年來穩向花
甌步乍歸來雞栖豚柵幾曾添補笑指頭銜冰樣冷誰

把草堂賢助看畫裏皋禽翔舞曲院層臺終斷手算迴
廊是我題詩處拚舊雨伴今雨

滿江紅

錢唐觀潮追和曹侍郎韻

曹侍郎錢唐觀潮一閱最為崛竒今見雕本改竄可惜
已康熙丙子秋涉江追和其韻并附原詞於後不作三
舍退避者欲存其真也

羅刹江空設險有海門雙闕日未午樟亭一望樹多於
髮乍見雲濤銀屋湧俄驚地軸轟雷發算陰陽呼吸本

天然分吳越 遺廟古餘霜雪殘碑在無年月訝揚波

重水後先竒絕齊向屬盧鋒下死英魂毅魄難消歇趁

高秋白馬素車來同弭節

枝乘七發弭節伍子之山

原作

曹溶

浪湧蓬萊高飛撼宋家宮闕誰盪激靈胥一怒惹冠
衝髮點點征帆都卸了海門急鼓聲初發似萬羣風
馬驟銀鞍爭超越 江妃笑堆成雪鮫人舞圓如月
正危樓湍轉晚來愁絕城上吳山遮不住亂濤穿到

嚴灘歇是英雄未死報讎心秋時節

點絳脣

題虞夫人玉映樓詞集

玉映樓空鏡臺留得傷心句比肩人去誰忍修簫譜

門柳風前依舊飄金縷簾纖雨返魂何處莫是秋千路

附
原詞

海鹽
閨秀虞兆淑蓉城

梅綻芳菲垂楊烟外低金縷韶華小住生怕廉纖雨
繡戶淒涼蝴蝶雙飛去愁如許夢魂無據還在秋

千路

卷之三

明倫彙編

三十一

曝書亭集卷二十六

欽定四庫全書

曝書亭集卷二十七

翰林院檢討朱彝尊撰

詞四

靜志居琴趣

清平樂

齊心耦意下九同嬉戲兩翅蟬雲梳未起一十二三年
紀春愁不上眉山日長慵倚雕闌走近薔薇架底生

擒蝴蝶花間

四和香

小小春情先漏泄愛縮同心結喚作去聲莫愁愁不絕須

未是愁時節纔學避人簾半揭也解秋波瞥象縷難

燒心字滅且拜了初三月

生查子

刺繡在深閨總是愁滋味方便借人看不把簾垂地
弱線手頻挑碧綠青紅異若遣繡鴛鴦但繡鴛鴦睡

搗練子

烟娟娟雨絲絲花外東風冷杜鵑獨上小樓人不見斷
腸春色又今年

菩薩蠻

低鬟十八雲初約春衫翦就輕容薄彈作墨痕飛折枝
花滿衣羅裙百子摺翠似新荷葉小立飲風纔移時
吹又開

卜算子

殘夢遶屏山小篆消香霧鎮日簾櫳一片垂燕語人無
語庭草已含烟門柳將飄絮聽遍梨花昨夜風今夜
黃昏雨

憶少年

飛花時節垂楊巷陌東風庭院重簾尚如昔但窺簾人
遠葉底歌鶯梁上燕一聲聲伴人幽怨相思了無益
悔當初相見

同作

華亭

錢芳標

蘇翻

小屏殘燭小牕殘雨小樓殘夢銖衣已烟散只蘅蕪
香重錦瑟華年愁裏送便淒涼也無人共傷心白
團扇畫秦娥簫鳳

漁家傲

淡墨輕衫染趁時落花芳草步遲遲行過石橋風漸起
香不已衆中早被游人記桂火初溫玉酒卮柳陰殘
照枕樓移一面船牕相並倚看淶水當時已露千金意

如夢令

詞少口入
卷二十七
橫塘斜日照扉松
釵柳帶依依
猶記石橋下
綠陰小舫
催歸花
飛花飛
獨自水上
蒲衣

秦樓月

春眠足
畫樓十二屏
山六屏
山六柔波不斷
遠峰難續
庭前種
盡相思木
機中織就
相思曲
相思曲
看朱成
碧
視丹如綠

朝中措

蘭橈並載出橫塘
山寺踏春陽
細草弓弓
鞞印微風
葉

葉衣香 一灣流水半竿斜日同上歸艎贏得渡頭人
說秋娘合配冬郎

瑤花 午夢

日長院宇鍼繡慵拈況倚闌無緒翡帷翠幄看盡展忘
却東風簾戶芳魂搖漾漸聽不分明鶯語逗紅蕉葉底
微涼幾點綠天疎雨 畫屏遮徧遙山知一縷巫雲吹
墮何處愁春未醒定化作鳳子尋香留住相思人並料
此際驚回最苦巫丁寧池上揚花莫便枕邊飛去

鵲橋仙

十一月八日

一箱書卷一盤茶磨移住早梅花下全家剛上五湖舟
恰添了箇人如畫 月弦新直霜花乍緊蘭漿中流徐
打寒威不到小蓬牕漸坐近越羅裙衩

天仙子

小擢若邪乘曉入芡蘿人已當風立好春不雨但濃陰
鉛水急溪紗濕麗草雲根香暗拾

又

小閣春寒烟乍禁
爐香先潤鴛鴦錦
低帷纔悔殺明燈
花影浸牕櫺
滲斜月一條剛到枕

南歌子

忍淚潛窺鏡
催歸嬾下階
臨去不勝懷
為郎迴一盼
強
兒鞵

芙蓉月

蠻府輟擢時
梅熟處
日日開風吹雨
無心好
亭早被行
雲勾住
難道今番是
夢夢裏分明說
與留不得
翠衾涼

珠淚飄殘蜜炬
啼鴉滿山樹謝多情小鳥勸儂歸去
秋期過了夜月寒生南浦執手枯荷池上宛種玉亭東
路貪夢好問柔魂可曾飛度

眼兒媚

那年私語小牕邊明月未曾圓含羞幾度已拋人遠忽
近人前無情最是寒江水催送渡頭船一聲歸去臨
行又坐乍起翻眠

鵲橋仙

辛夷花落海棠風起朝雨一番新過狸奴去後繡整溫
且伴我日長閒坐笑言也得欠伸也得行處丹靨姍
娜簸錢鬪草已都輸問持底今宵償我

行香子

蠶月桑津輕浪魚鱗好風光最易愁人相逢休便閒却
殘春待播船迴游驄去又因循歌罷梁塵舞散花茵
下樓梯簾外逡巡有緣並坐不在橫陳話夜闌時人如
月月如銀

增字漁家傲

百蝶仙裙風易裊，藕霞低垂淺露驚鴻爪。元夕初過寒
尚峭，呼別擢雪花點點輕帆杪。別院羊燈收未了，高
揭珠簾特地留人照。衆裏偏他迴避早，猜不到羅幃昨
夜曾雙笑。

金縷曲

枕上閒商略，記全家元夜看燈小。樓簾幙暗裏橫梯聽
點屐，知是潛回香閣險。把个玉清追著徑，仄春衣風漸

逼惹釵橫翠鳳都驚落三里霧旋迷却
星橋路返填河鵲算天孫已嫁經年
夜情難度走近合歡牀上坐誰
料香含紅萼又兩暑三霜分索綠葉
清陰看總好也不
須頻悔當時錯且莫負曉雲約

十六字令

尋簾外無端墮玉簪籠燈去休待落花深

摸魚子

粉牆青蚪檐百尺一條天色催暮
洛妃偶值無人見相

送韞塵微步教且住攜玉手潛行莫惹冰苔仆芳心暗
訴認香霧鬟邊好風衣上分付斷魂語 雙栖燕歲歲
花時飛度阿誰花底催去十年鏡裏樊川雪空裊茶烟
千縷離夢苦渾不省鎖香金篋歸何處小池枯樹算只
有當時一丸冷月猶照夜深路

婆羅門令

九日

渠去日一帆春水儂到日也一帆秋水怪道相逢翻不
是相期地無一語只當相逢未 霜風緊霜葉脆上危

梯九日層樓倚樓頭縱得潛攜手催去也怨鷓鴣紅紫
別時真惜住也無計此恨絲絲詎已每遇登高會使灑
登高淚

西江月

傍玉何曾暑熱惜香最恨眠遲殘燈未殺影迷離一點
紗籠紅蕊 小雨初過庭樹新涼漸近羅幃殷勤臨別
為披衣軟語蟲飛聲裏

城頭月

金夕...
卷二十七
別離偏比相逢易，衆裏休迴避。喚坐回身料是秋波難
制，盈盈淚。酒闌空有相憐意，欲住愁無計。漏鼓三通
月底燈前沒箇商量地。

兩同心

認丹靨響下畫樓遲，犀梳掠倩人猶未。螺黛淺俟我乎
而看不足，一日千迴眼轉迷離。比肩縱得相隨，夢雨
難期。密意寫折枝朶朶柔魂，遞續命絲絲，誰神賦小字
中央，只有儂知。

臺城路

晨紅纔射南牕影。犀帷被誰驚起。啁雀爭枝，寒梅吐萼。
攪得雪花都墜。暗香簪未早，濕了當風畫羅衣。袂簡點
熏籠，辟邪爐火，陷灰細。昨宵回憶，並坐問何曾酒釀。
宿醒如是，椒攬漿酸，蛤蜊湯俊，猶道不消殘醉。曲屏斜
倚，看舊婦眉峰漸低，穹翠半枕。薈騰到日高，翻睡。

南鄉子

明日別離人未戀。今宵月似銀。只願五更風又雨，飛到

暮啼殺杜鵑催不去

又

斗帳杏梁西不許花蚊見並棲分與羅衾香繚繞遮了
一翦微風紈扇小

聲聲慢

七夕

桐陰重碧玉葉輕黃溪沙過雨無泥盡卷纖雲一鉤涼
月樓西尋思昔游歷歷記迴廊纖手曾攜好風度愛吹
衣香細點屐聲低誰道離多會少比露蛩秋蟀只解

凝啼恨別江淹舊時南浦都迷輸他雙星歲歲料紅牆
銀漢難躋孤夢遠尚牽人橫閣小梯

夢芙蓉

日長深院裏見微吟紅豆學書青李鼠鬚散卓曾付埽
眉翠綠紗風不起爐烟都篆心字密締星期許支機石
畔來往絳河水誰料分飛萬里霧露芙蓉恨別成秋
蒂桃蹊重到仙犬遽迎吠澀塵凝滿砌夕陽空自垂地
舊日迴廊剩枇杷一樹花下小門閉

三姝媚

灣頭登小牒慣風生衣香水湔裙招待到重門縱教攜
玉腕尚羞紅頰月姊窺儂也勸飲深杯稠疊織女機邊
一綫秋河夜涼人涉 早是含情迎接怕峽雨他山易
霑桃葉第一相思是牀東鞞刻暗塵潛躡舊事淒涼化
亭裏雙飛蝴蝶剩有輕綃十幅曾圍秀靨

滿庭芳

雨蓋飄荷霜枝釘菊滿庭芳草萋萋莫愁催送香徑手

重攜疊取鴛鴦繡被屏山近已分雙棲金簪拔暗除了
鳥不用繞唐梯 低帷聽細語五湖心事釵卜難稽得
霧深三里花隔千溪只是仙源無路添惆悵殘月荒雞
繩河曉黃姑織女依舊水東西

青玉案

灣頭分手盈盈步潛約到西湖住蘇小門前芳草渡依
稀曾記小樓深巷儘是銷魂處 到來忽下前溪路月
黑頻催送柔櫓及至前溪人又去游絲落絮春來無定

總被東風誤

南樓令

疎雨過輕塵。圓莎結翠茵。惹紅襟、乳燕來頻。乍暖乍寒
花事了，留不住，塞垣春。歸夢苦難真。別離情更親。恨
天涯、芳信無因。欲話去年今日事，能幾箇，去年人。

又

垂柳板橋低。嬌鶯著意啼。正門前、春水初齊。記取鴉頭
羅襪小，曾送上，窻娘堤。花底惜分攜。苔錢舊徑迷。燕

巢空落盡芹泥惟有天邊月在猶自挂小樓西

後庭花

低鬟歛盡雲顰側粉香都拭生憎桂帳秋蚊入教郎輕
擘紅藤細織暹羅席方花盈尺冷波一任鴛鴦拍殘
夢無力

減蘭

犀梳在手逋髮未撩勻面後眉語心知引過閒房步步
隨頰香暖玉牽拂腰巾帶重東一段歸雲誰驗蛇醫

臂上痕

好事近

往事記山陰風雪鏡湖殘臘燕尾香緘小字十三行封
答 中央四角百回看三歲袖中納一自凌波去後悵
神光難合

浣溪沙

桑葉陰陰淺水灣更無人處竹迴環飛來一片望夫山
勸客且留今日住催歸深悔那時還斷腸朝雨賦陽

關

卜算子

留贈鏡湖紗
浣女機中織
裁作輕衫穩
稱身更染蒲萄色
松葉頗黎碧
勸飲春纖執
本向人前欲避嫌
禁不住心憐惜

賣花聲

相見罷凭闌
並坐重關
熏爐初徙鏡臺寬
子石琢成蓮葉小
教試麋丸
畫扇翠峰攢
一面霜紈
別來詩句幾

曾閑雜體江淹三十首都寫伊看

紅娘子

袖薄吹香過髮重
縈髮嬾壓泉風流
傾城色笑趁時梳
裏慣新詩詠罷少人知
一篇篇教和別淚看頻墜
密約何曾果七夕
星河中秋院落上元燈
火悔當時花月
可憐宵鎮相逢閒坐

換巢鸞鳳

桐扣亭前記春花
落盡纔返吟鞭
鴨頭凝練浦鵝眼
眉

榆錢蘭期空約月初弦待來不來紅橋小船蓬山近又
風引翠鬟不見飛燕書乍展哽咽淚痕猶自芳牋染
玉鏡妝臺青蓮硯匣定自沉吟千徧解道臨行更開封
背人一縷香雲翦知他別後鳳釵攏鬢深淺

如夢令
七夕

記摘小園瓜李七夕年時花底騃女嫁癡牛嫁到良宵
十四彈指彈指好事已成虛事

采桑子
五月六日

攜來九子同心糝蒲酒猶儂夜帳輕容續命絲長鍼再
縫 須知後會渾無據難道相逢十二巫峰峽雨輕迴
第四重

一葉落

淚眼住臨當去此時欲住已難住下樓復上樓樓頭風
吹雨風吹雨草草離人語

無悶 雨夜

密雨垂絲細細晚風約盡浮萍池水乍一霎黃昏小門

深閉作去聲弄新涼天氣怕早有井梧飄階砌正楚筠簟
冷香篝簡點舊時鴛被無計纔獨眠更坐起恁說愁
邊滋味翠蛾別久遠信莫致縱有夢魂能記尋不到長
安三千里料此夜一點孤燈知他睡也不睡

點絳脣

萬里將行翦燈重伴西樓語遠書欲附細把郵籤數
風雨江頭不許離人去離人去斷腸歸路秋草真娘墓

風蝶令

金少卿八十二
卷二十七
秋雨疎偏響秋蟲夜迸啼空牀取次薄衾攜未到酒醒
時候已淒淒 塞鴈橫天遠江雲擁樹低一灣楊柳板
橋西料得燈昏獨上小樓梯

鵲橋仙

青鷺有翼飛鴻無數消息何曾輕到瑤琴塵滿十三徽
止記得思歸一調 此時便去梁間燕子定笑畫眉人
老天涯况是少歸期又匹馬亂山殘照

玉闌干

玉闌干外秋蛩語一架豆花清露蘭湯浴罷納新涼攜
纖手夜深爾汝綠牕人遠紗空護網暗塵蛛絲無數
舊時梁燕也驚心一回來却又飛去

柳梢青

回雁書遲燒燈時候尚促歸期獸錦梭拋鮫珠淚盡也
忒相思彩雲天遠瑤姬便不管人間別離約指輕彊
熏香小像都悔還伊

留春令

鍼樓殘燭鏡臺剩粉醉眠曾許長記羅幃亭回初響幾
點催花雨 別淚連絲繁主簿騰定情詩句一樣霜天
月仍圓只不照凌波步

少年游

清溪一曲板橋斜楊柳暗藏鴉舊事巫山朝雲賦罷亭
裏是生涯 而今追憶曾游地無數斷腸花塘上鴛鴦
梁間燕子飛去入誰家

祝英臺近

紫簫停錦瑟，遠寂寞。舊歌扇、萍葉空池。卧柳埽還倦，便
令鳳紙頻書。芹泥長潤，招不到、別巢秋燕。露華泣，猶
剩插鬢金鈴。殘菊四三點，階面青苔不雨也。生徧縱餘
一縷香塵，灑羅曾印，奈都被西風吹卷。

風入松

朝雲不改舊時顏，飛下屏山。嚴城乍報三通鼓，何繇得
遮亭重還。露葉猶聞響屐，風簾莫礙垂鬟。簪花小字
篋中看，別思迴環。穿鍼縱有他生約，悵迢迢、路斷銀灣。

錦瑟空成追憶玉簫定在人間

慢卷紉

桃葉舟回楓林客去西渚波千疊見十里橫塘幾陣涼
颼獨上小樓柔腸斷絕春信鶯花秋期河漢總是愁時
節悵碧海青天夜色蒼涼歸去明月 淒淒切切相思
苦夢雨何曾歇恁不似當年絳脣含笑而今賸有啼痕
淚頰洛浦川長青谿路斷曉露風燈滅但寄語江淹有
個人兒莫便輕別

玉樓春

殘霞散盡魚天錦，
柳門前萍葉浸。
畫梁塵暝燕空歸，
露井風多蛩未寢。
悲秋楚客今逾甚，
那有閒情拚夜飲。
屏山凝睇已無存，
何況玉鈿金帶枕。

臨江仙

寒水籬根二尺，
莫愁艇子能容。
纖纖細步到房櫳。
青蛾勻黛淺，
粉拂掠雲鬆。
憶食憶眠憶坐，
好春長定相逢。
侍兒一一小名重。
卷衣孫秀秀，
滅燭許冬冬。

又

昨日苦留今日住來朝再住無因畫樓欲下幾逡巡殘
燈三兩燄別淚一雙人料得離居多少恨歸期數徧
冬春長愁不獨繭眉顰口中生石闕腹內轉車輪

又

白鷺飛邊舟一箇縈迴幾曲芳洲晚涼重過曝衣樓籠
燈迎竹外搖櫓到沙頭烟水空存挑葉渡依然蘭月
如鈎十年霜鬢不禁秋可憐新蝶亭猶戀舊蚊幃

洞仙歌

書牀鏡檻記相連斜桷慣見修蛾遠山學倩青腰授簡
素女開圖纔凝盼一綫靈犀先覺新來窺宋玉不用
登牆近在蛛絲畫屏角見了乍驚迴點屐聲頻分明覩
翠帷低擢旋手揭流蘇近前看又何處迷藏者般難捉

又

謝娘春曉借貧家螺黛須拗花枝與伊戴傍妝臺見了
已慰相思原不分雲母船牕同載叢祠燈火下暗祝

心期衆裏分明並儂拜盡說比肩人目送登艫香漸轉
晚風羅帶信柔櫓嘔啞撥魚衣分燕尾溪流赤欄橋外

又

津亭回首望高城天遠何況城中玉人面數郵籤萬里
嶺路千重行不得懊惱鷓鴣啼徧鬱孤臺畔水解送
歸人三板輕船疾於箭指點莫愁村樹下門前怪別後
雙蛾較淺若不是臨風暗相思肯猶把留題舊時團扇

又

仲冬二七算良期

仲冬二七是良期秀州精嚴寺鬼詩也

若再沉吟

甚時可况熏爐漸冷
牕燭都灰
難道又各自抱衾閑坐

銀灣橋已就
冉冉行雲
明月懷中半霄墮
歸去忒忽

忽軟語丁寧
第一怕鞞羅塵
浣料消息青鸞定應知也

莫說今番不曾真个

詹玉詞不曾真个已銷魂

又

別離改月便恹恹
成病鎮日相思
夢難醒喚連船渡口

晚飯蘆中相見了
不用藥爐丹鼎
雙銀蓮葉殘滿貯

椒花同向燈前醉
司命昵枕未三更
蘭夜如年奈猶憾
亂鴉初景起折贈黃梅鏡
奩邊但流睇無言斷魂誰省

東京夢華錄十二月二十四日備酒
果送神以糟塗竈門謂之醉司命

又

東風幾日覺春寒
猶甚纖手偷攜笑誰禁
對初三微月
看到團圓鋪地水
處處鞦韆羅涼浸
周郎三爵後顧曲
無心爭忍厭厭夜深飲
只合並頭眠有限
春宵切莫負
煖香鴛錦最難得
相逢上元時且過了收燈
放船由恁

又

佳期四五問黃昏來否說與低帷月明後怕重門不鎖
仙犬窺人愁未穩花影忽忽分手 雞缸三兩殘力薄

春醪何事卿卿便中酒翻喚養娘眠底事誰知燈一點
尚懸紅豆恨咫尺繩河隔三橋全不管黃姑夜深來又

雞缸成窰
小酒杯也

又

城頭畫角報橫江艫舳催上扁舟五湖曲怪芻尼噪罷

蟬子飛來重攜手也算天從人欲
紅牆開突與轉入
迴廊小小牕紗拓金屋隨意楚臺雲抱玉挨香冰雪淨
素肌新浴便歸觸簾旌侍兒醒只認是新涼拂檐蝙蝠

又

韶光最好甚眉峰長聚相勸乘船漾南浦盼海棠簪後
插到荼蘼同夢裏又是棟花風雨
橋東芳草岸勝樂
游原勾隊爭看小蠻舞雀舫曳疎簾蛛網浮杯但日日
鸞簫吹度聽唱徧青春驀山溪待拆了歌臺放伊歸去

又

三竿日出愛調妝人近
鳧藻熏爐正香潤看櫻桃小注
桂葉輕描圖畫裏只少耳邊朱暈
金簪二寸短留結
殷勤鑄就偏名有誰認
便與奪鸞篋錦髻梳成笑猶是
少年風韻正不在相逢合歡頻許
並坐雙行也都情分

又

花餽九日綴蠻王獅子圓菊金鈴鬢邊媚向閒房密約
三五湏來也不用青雀先期飛至
恩深容易怨釋怨

成歡濃笑懷中露深意得个五湖船
雉婦漁師算隨處可稱鄉里笑
恁若將伊借人看留市上金錢儘
贏家計

孟子注西施每入市人
欲見者先輸金錢一文

又

隔年芳信要同衾元夕比及歸時
小寒食悵鴨頭船返桃葉江空端
可惜誤了蘭期初七易求無價寶
惟有佳人絕世傾城再難得薄命
果生成小字親題認點點淚痕猶
裛怪十樣蠻牋舊曾貽祇一紙私
書更無消息

又

蘋洲小擢約兒娘相共豈意錢唐片帆送逢故人江上
一路看山寧料我過了惡溪靈洞 東甌城下泊孤嶼
中流明月秋潮夜來涌此際最消凝苦憶西樓想簾底
玉鈎親控舍舊枕珊瑚更誰知有淚雨烘乾萬千愁夢

又

蕭郎歸也又燒燈時節白馬重嘶畫橋雪早青綾幃外
含笑相迎花枝好繡上春衫誰禰 十三行小字寫與

臨摹幾日看來便無別排悶偶題詩玉鏡臺前渾不省
竊香人竊待和了封題寄還伊怕密驛沉浮見時低說

又

明湖碧浪枉輕帆尋徧咫尺仙源路非遠訝杜蘭香去
已隔多時又誰料佳約三年還踐 纖腰無一把飛入
懷中明月重窺舊時面歸去怯孤眠鏡鵲晨開雲鬢掠
小脣徐染偏走向儂前道勝常渾不似西牕夜來曾見

又

行舟已發又經旬調笑不算忽忽別離了奈飛龍骨出
東竹腸攢月額雨持此淚珠差少 羅囊鍼管就絡以
朱繩淡墨疎花折枝裛中有錦牋書密囑歸期道莫忘
翠樓烟杪枉姑負劉郎此重來戀小洞春香尚餘細草

又

崔徽風貌信十平分姚冶八尺吳綃問誰借悔丹青不
學殺粉調鉛呈花面輸與畫工傳寫 乘閒思挂壁分
付裱池卷處香生一囊麝自化綵雲飛蟲網蝸涎又誰

對芳容播喏儘沉水烟濃向伊熏覲萬一真真夜深來

也

圓安替月潤臉呈花唐人志銘
中語也李賀詩沉香熏小像

鳳凰臺上憶吹簫

題朱十靜志居琴
趣後

曹溶

燒燭鴻天惜花雞塞馬卿偏好傷春正翠鈿盈袖弱
絮隨輪無限柔腸宛轉秋雨夜亭想朱脣抽銀管湘
簾乍卷寶鴨橫陳 真真者番瘦也酒醒後新詞只
索休頻待繡帆高挂遲日江濱齊列瑤箏檀板攜妙
妓徐步香塵歸難驟寒宵坐來一對愁人

怨王孫

七夕

一水填却雙星如約乞巧誰憑懣愁君莫知道騃女癡
牛肯憐不悠悠歲月辭家者孤眠且此夕何夕也碧
梧小院風細露檻同凭昔年曾

憶少年

一鈎斜月一聲新雁一庭秋露黃花初放了小金鈴無
數燕子已辭秋社去剩香泥舊時簾戶重陽將近也
又滿城風雨

欽定四庫全書

曝書亭集
卷二十七

五

曝書亭集卷二十七

欽定四庫全書

曝書亭集卷二十八

翰林院檢討朱彝尊撰

詞五

茶烟閣體物集上

柳色黃

對雨

岸側榆錢牆角棟花吹已將盡
漸添綠葉陰濃轉覺晚
來風緊絲絲縷縷界開密霧低
烟暗催闌藥紅尖潤怕

鳳子衣單把柔黃都褪
休問鈿車驄馬縱約歸期料
應難準最憶江南屐齒滿街聲趁吳歌幾曲穩坐細浪
魚天落帆笑指柴門近任踏破苔痕數小園新筍

渡江雲

欲雪

河水遙度馬稜稜寒色望裏但疎蕪漸吟蛩已靜祇聽
空林大觜啄飢烏魚鱗萬點斂雲英半晌模糊却一似
畫家米虎潑墨寫江圖
南湖恁時風景春到苔枝有
紅梅樹樹儘容我青鞵岸淨白舫燈孤而今苦被浮榮

縛擁殘氈不比蘭蘇拚醉也牀頭酒價都無

聒龍謠

雪

密比花繁輕嫌絮重一半斜侵簾戶淡抹牆腰似月稜
初吐纔飄墮凍雀聲中又壓倒早梅開處縱旗亭臘釀
堪沾已迷却板橋路 颼風緊亂雲低見潑墨點點林
鴉催暮一絲漁艇料今番歸去訝光寒入夜翻明漸灑
急聽牕如雨問隔江桃葉桃根尚能來否

春風袅娜

游絲

倩東君著力繫住韶華穿小徑漾晴沙正陰雲籠日難
尋野馬輕颺染草細縮秋蛇燕蹴還低鶯銜忽溜惹却
黃鬚無數花縱許悠揚度朱戶終愁人影隔牕紗 惆
悵謝娘池閣湘簾乍卷凝斜盼近拂簷牙踈籬骨短牆
遮微風別院好景誰家紅袖招時偏隨羅扇玉鞭墮處
又逐香車休憎輕薄笑多情似我春心不定飛亭天涯

無亭令

飛花

魚浪飄香千點燕尾分烟一翦已自出牆東又被輕風

吹轉輕風吹轉剛逗卷簾人面

步蟾宮

端溪觀來硯

蒼山暗東寒江轉問巖穴探時深淺不妨篝火夜連朝
待割取谿雲一半 踈踈嫩葉青花遍比割却羊肝更
軟看來只合寄情人已早有相思淚眼

掃花游

試茶

棟花放了正穀雨初晴逼籬雲水曉山十里見春旗乍
展綠槍未試立倦濃陰聽到吳歌徧起焙香氣裊一縷

午烟人靜門閉 清話能有幾任舊友相尋素瓷頻遞
悶懷盡矣况年來病酒夜闌須記活火新泉亭繞松風
曲几暗燈裏隔牕紗小童斜倚

一枝春

汪舟次貽流求筆筠管蘆管各一同查
容賦之

海外青羊也中書偶被星查搯到明牕脫帽掐破麻姑
纖爪黃蘆墨竹慣斜鏤一枝花裊持比似諸葛宣城樣
變棗心翻巧 遙憐水雲孤島想銀光研紙留題多少
小扇香奩愛染夕陽芳草層波萬里付吳下阿儂誰料

端可惜老去章臺畫眉嬾了

筆帽裂其一
面活脫下上

瑞鶴仙

錢編修庸亭席上觀司馬相如私印

土花凝古繡見細紋卷髮冷光塗黝朱縹覆冰紐愛千
年未蝕幾絲紅籀燒春熟後料無心蟲魚刻鏤算除非
賣賦金多書券恁時纔有知否遙山描罷卓女風流
定拈纖手摩抄已久挑短燭把看又論才華不是凌雲
健筆可許尋常消受拚夜寒典了鸛裘肯教換酒

天香

龍涎香

汎下吟殘波中燄後珠宮不鎖癡睡沫卷盤鴻腥垂尺
木采入蚤船鮫市南蕃新譜和六一丹泥分製裏向羅
囊未許攜歸金匱先試 炎天最饒涼思井華澆帛鋪
澄水百沸瓊膏噓作半牕雲氣腐火溫磨欲陷又折入
犀帷裊難起螺甲重挑茶烟較細

又前題

擣就花房鏤成棗印勻摹七寶痕淺小鼎蟠螭沉灰撥
獸銀葉中央徐點靈釵乍漉早搖曳雲魂一線壓住秦

篝又起偏噓杏梁棲燕 客愁雨餘清簟潤涼波半食

新煖最憶玉牕人怯擘時曾見認得吳家心字話江漲

橋南寄來遠春夢羅囊賦情未倦

能改齋漫錄近時士人於錢塘江漲橋為

狹斜之游其後陷河南不返其友寄以龍涎香士人酬之云認得吳家心字香玉牕春夢紫羅囊

十二時 雲母燈

是何人碧山深處潛入仙廚私竊把石粉雲英堆積翦

翦層層疊疊面面裝成稜稜作去

聲

就細染紅牋貼正夜

靜改席西園紫鳳吐珠曾否銅槃吹滅 閒更思梨花

院落定自十分清絕宿鳥窺來飛蛾拂去不道成冰雪
謾認他是燈分明一片冷月也只消拋殘小扇玉面
當前終怯怎得攜歸江南樂事鬧向元宵節看翠眉幾
許屏風影中低說

點絳脣

鞦韆

香袂飄空為誰一笑穿花徑有時花頂羅韞纖纖並
飛去飛來不許驚鴻定重門靜粉牆深映留取春風影

前題

曲周

王顯祚

湛求

青粉牆高是誰紅索中搖曳窄衫初試轉覺腰支細
冷笑江南不省春遊戲層檐底畫裙窄地生怕風
扶起

和韻

桐鄉
錢 琰 又持

小院層闌下臨一道藤蕪徑柳梢花頂飛燕羞堪並
孌娜春風不放游絲定金鈴靜翠遮紅映忍露全
身影

釵頭鳳

藏鈞

華筵半銀燈燦玉鈎纖手陳青案傳言快分曹待暗將
心事把秋波賣在在在 番番換低低喚个儂翻被人
偷算三杯外含嬌態不應輸與笑拈衣帶再再再

臨江仙

金指環

削就葱根待束挂將榴火齊炎殷勤搓粉為君拈愛他
金小小曾近玉纖纖 數徧檀郎十指帶來第五猶嫌
憑教麗句續香奩解時愁不斷約了悶翻添

踏莎行

叙

金重難勝翠，勻如沐愛他。也有同心目，曉來尋慣枕。函
邊坐懷先，綰香雲束。小鳳垂珠小，魚銜玉。離愁夜半
挑殘燭，玉郎消息斷。紅牋背人潛，把歸期卜。

鵲橋仙

鞦韆

湖羨烏角渚，蓮紅瓣不比。幫兒還瘦拈來，直是小舸船。
只合借燈前行酒。春陽花底春泥陌上，最好踏青時
候。假饒無意，把人看，又何用明金壓繡。

秦樓月

吹笙

涼烟翠銀河澌澌光垂地光垂地小樓一曲月華如水
排成鳳翅聲初遞聽殘鶉管君須記君須記風簾卷
處那人雙髻

沁園春

額

鏡檻初開宜對粉題休籠紫綸記折花共劇蘭雲纔覆
塗妝伊始翠鈿曾安慣疊纖羅微嫌短髮手裏紅絲著
意刪犀梳斂護貂茸一翦閣住輕寒日斜倚小門闌
但端正窺人莫使還見障羞月扇低時半露吹愁梅瓣

點處成斑素柰看勻小蟬比並料是詩人想像間蜂黃

淺愛夕陽無限映取遙山

李白詩妾髮初覆額折花門前刺王建詩素柰花開西子

面衛風蛛首蛾眉孔氏疏云小蟬也溫庭筠詩額黃無限夕陽山

前題

錢芳標

憶折花時幾寸青絲髮髮覆初愛寶奩對影安黃恰
正小鈿當面貼翠誰如解事春風多情梅瓣數點含
章殿角虛山無限映夕陽一抹眇眇愁余 水晶簾
底妝梳又怕熱蟬紗緜乍除道宮眉學畫量來休廣

宿醒餘困感罷纔舒嬌女詩中碩人句裏費盡才情
比擬渠殷勤祝舉玉纖加處默訴冰蜍

又鼻

滴粉堆成黃點輕黏運斤可能見窺簾乍露斜侵短燭
挑鬟欲徧易近圓冰愛歟青梅慵填香棗扶下秋千喘
未勝閒中坐試微噓素指暗驗鈎繩 荷風水檻長憑
盼消息郎歸嚏定曾伴謝公游去聯吟或擁徐妃妝後
半面須絙淚泣低分汗融先拭紅袖遮來媚轉增凝神

久想新停月脈旋抱飛蠅

抱朴子玉女常以黃玉為誌大如黍末在鼻上是真玉女

也圓冰小鏡名香棗用石崇事淮南子子午卯酉為二絕丑寅辰巳未申戌亥為四鈎俗傳鼻息左右可以驗

時婦人有娠
蠅抱其鼻

又耳

玉琢芳根麝月初弦螺峰遠侵勝吳綃畫了微添朱暈
秦璫繫却密釘神針粉拂頻沾香雲帶掠釵鳳珠垂冷
不禁盤龍鏡映玉臺素手影後斜臨 小堂誰弄清琴

通一線靈犀直到心慣春閒易倦偷黏角枕夢輕難續

翻恨鶯吟細馬馱來埃風生處掩就綸巾未易尋羅幙
底把無聲私語遞向更深

唐張萱畫婦人以朱暈耳根

前題

錢芳標

阿母前頭影語微詞靈犀早通幾傳來芳信喜占晴
鵲送來愁緒暗數秋蛩撼笛層樓賣花深巷閑處關
心幼便聰纖瓊嫩倩香貂垂鬢護取尖風 附時密
約喁喁怕侍女猜嫌未許從儘亭回山枕半輪欵仄
妝成珠珥兩朶玲瓏髮鬢纔梳鬢環欲吐弦月依稀

翠霧籠重門鎖怪誰呼小字熱處微紅

又齒

文貝編成密鎖華池懸漿易露愛蘭湯乍嗽含朱愈瑩
瓠犀難擬排玉還鈿刺繡花勻縫衣結扣持裁餘絲不
用添芳津嚙對青梅一點軟却慵拈 早鴉啼徧前檐

悄叩罷潛將心事占見輕塵動處歌時定啓愁眉展後
齒慣休嫌忍病先寒因嬌或喋竹想頻銜素指纖相思

字漫沉吟齧筆褪了毫尖

釋名曰口下曰承漿針灸經曰承漿一名懸漿也醫家口

齒方有唐邵英後排玉集司
馬相如作賦把筆畫之似魚

又肩

紈質停勻比似陸郎何曾暫離被詞人賦就望中疑削
畫工減盡滌處恒垂籬弱纔過牆低乍及結伴還從影
後窺緣紅索上秋千小立恰並花枝 蝓蟻領下訶梨
翦雲葉玲瓏一半虧記量成尺六難增分寸飲過三爵
易致斜敲愛拍樽前頻扶倦裏細步惟應處處隨吟飛
雪怕玉樓生粟拂袖遮伊

海鹽陸東美妻有容止夫婦
相重寸步不離時號比肩人

洛神賦肩若削成畫法美人無肩漢雜事肩廣尺
六寸蘇子瞻雪詩凍合玉樓寒起粟玉樓謂肩也

又臂

勝母陀羅八萬四千非耶是耶效躡搖娘曲聯時宛轉
胡騰兒舞旋了交加拍案霓裳張同鳳翅攘處拖環急
鼓搥呼同坐把香肩微竦側倚琵琶 曲欄憑晚涼些
添羅袖纔令一半遮更泥他沽酒卸金跳脫教伊展畫
替玉鴉叉待枕先舒將盟暗齧宜印綢繆小字斜臨當

別擣花房蜥蜴重繫紅紗

首楞嚴經二臂四臂乃至八
萬四千母陀羅臂李紳拓枝

欽定四庫全書

卷二十八

伎詩畫鼓拖環錦臂攘又鳳聲初歇翅初張李商隱詩
展畫玉鴉又鬢臂盟見左傳唐宮人選幸以綢繆字印
臂

又掌

小小瓊田煖玉無塵紋生細波慣先調粉澤兩邊齊傅
未昏菱鏡一面頻磨鞞拓真纖指離偏遠水上湔裙著
意搓闌干拍菴鴛鴦驚起飛度風荷樽前一握無多
縱燕燕身輕舞則那任青紅碧綠按成綵縷裁縫熨貼
研就香羅冷露三霄明珠幾顆除是仙人不讓他春來

病把芳心捧罷百徧摩抄

楊无咎詞掌拓鞵兒漢雜事
拈去掌四寸李商隱詩仙人

掌上三

霄露

又乳

隱約蘭胸菽發初勻脂凝暗香似羅羅翠葉新垂桐子
盈盈紫萼乍擘蓮房竇小含泉花翻露蒂兩兩巫峰最
斷腸添惆悵有纖袿一抹卽是紅牆偷將碧玉形相
怪瓜字初分蓄意藏把朱欄倚處橫分半截瓊簫吹徹
界住中央量取刀圭調成藥裏寧斷嬌兒不斷卽風流

句讓屯田柳七曾賦酥娘

漢雜事胸乳菽發

又膽

藥塢芝房一點中池生來易驚笑金釵卜就先能斷決
犀株鎮後纔得和平樓響登難房空怯最三斗除非借
酒傾芳名早喚狗兒吹笛伴取歌聲 沉憂何事牽情

悄不覺人前太息輕怕殘燈枕外簾旌蝙蝠拂幽期夜半
牕戶雞鳴愁髓頻寒回腸易碎長是心頭苦暗并天邊

月縱團團如鏡難照分明

黃庭經注膽為中池素問膽主斷決李賀詩犀株防膽怯

三斗借用管輅事元稹詩狗兒吹
笛膽娘歌內經膽病者善太息

又腸

嫵嫵輕軀能有幾多容萬斛愁慣悲銜腹內相看脈脈
事來心上一樣悠悠烏道千盤轆轤雙綆又類車輪轉
未休縈方寸穿錦梭暗擲弱縷中抽 柔情曲似江流
怕易割秋山嬾上樓况三朝三暮巴猿峽口一聲一斷
杜宇枝頭百結將離九迴猶剩杯沃能勝酒力不樽前
曲再休歌河滿淚落難收

白居易詩能有幾多腸錦梭
用梭腸有意錦絲穿語魚玄

機詩離腸百結解無由李商隱詩回腸九回後猶有利
回腸又白詩三杯自要沃中腸唐孟才人歌河滿子卑
武宗命醫侯之脈
尚溫而腸已絕矣

又背

意遠態濃珠壓腰初冰肌最勻盼新月堂前殷勤匍伏
秋千架上推遞逡巡見客遙來和羞却走翩若驚鴻望
未真踏青去惹春游年少目送香塵催歸潛理紈巾
怕汗浹輕容拭更頻憶閒中指爪癢頭爬慣宵分姊妹
擁便情親每到嗔時拋郎半枕難齧猩紅一點脣堪憎

甚縱千呼萬喚未肯迴身

杜甫詩背後何所有
珠壓腰袂穩稱身

又膝

織骨亭亭窮袴輕籠長裾半懸訝流黃織慣頻掀絲底
小車容却每觸簾邊手抱無聊心慵易軟拜起須扶態
更妍留仙皺見勝常道罷小立依然 試令蹈節歌筵
翹一足長同沙鷺拳把春衣卸盡有時蔽錦寒衾架處
恨未添絲醉裏便姍嬌時嬾密隨意天斜坐簸錢教郎
坐放阿侯學步俯視齊肩

曹植靜思賦行嬾密而妍詳
古樂府十七生兒字阿侯

雙雙燕 別淚

問銀海水有多少層波斂愁飄怨含辛欲墮轉自把人
凝盼露向長亭早晚定減了輕塵一半安排玉箸離筵
伴我樽前腸斷偷看夜來枕畔傍鏡影初乾袖痕重
按心心心上總是別情難慣縱遣絲垂縷縮穿不起南
珠盈串裁得幾幅榴裙點點行行都滿

笛家

題趙子固畫水墨水仙

亡國春風故宮鉛水空餘芳草冷花開徧江南岸王孫

老矣文采風流墨池筆壻淚痕都染帝子含顰洛靈微
步宛在中洲半悵騷人未經佩徒藝楚英九畹 繚亂
一叢寒碧生烟踈雨隨意敲斜鵝絹蟬紗寄情悽惋尚
想白石蘭亭遺事逸興千秋如見豈似吳興君家承旨
蕃馬風塵滿縱自署水晶宮怕有鷗波難浣

金縷曲

水仙花禁用湘妃漢女洛神事

小草先春令問誰移香本南園罷栽幽徑定武紅瓷看
最好銀蒜十囊齊迸簇薤葉萱芽相並幾點青螺攢秀

石護冰苔一片涼沙淨喚仙子踏明鏡
詩家比喻閒
重省未輸他礬弟梅兄暗香疎影風露人間渾不到晴
日紙牕留映襯髻几畫屏斜整艷紫天紅昏亭裏料更
番花信催難醒孤芳在伴清冷

又前題

霽雪明吟院愛青青秀葉低排獨呈花面玉潤金寒爭
憐惜肯放風簾高捲把十二屏山遮斷不信江南芳草
渡傍蓬根艾底尋常見魚天暝鷺翹徧
仙姿豈上閒

釵釧便兜娘要插蘭雲未容輕翦縱被春纖偷掐了折
送膽甌猶戀怕零落國香誰管憑仗王孫鈎水墨恣踈
踈密密勻深淺湏一幅好東絹

又 前題

何處無香草戀晴牕靈苗抽並粉麩開早夢想西湖歸
未遂日日緇塵烏帽對冷艷娉娉孌孌料得芳心應笑
我把風前黃藕冠敲倒簪碧玉袂阿縞 萬花只向春
陽鬧惹多情游絲牽住曳鈴催老便是秋林攢幾簇也

金定世八言
卷二十八
有蝶銜蜂抱誰似此幽芬繚繞繡入羅裙嫌太淡配山茶一捻紅尤好還又怕被花惱

又前題

物候開春籥驗芳根頹簷曝後畫盆移却稚葉青回纔
幾日又吐小蓮冰萼勝翠袖香藏珠絡雪虐風饕都過
了倚南牕晴景還如昨雖遲暮未寂寞惜花不用圍
簾幙任筵前山薌舞罷幾曾吹落靜色孤光誰結伴除
是早梅江閣比多少汀蘆洲葑楚澤行吟憔悴矣料遺

忘偶爾騷人錯留共我歲寒約

滿江紅

西湖荷花

郭外垂楊直映到水仙祠屋愛十里花明鏡面岸沉沙
腹幾陣涼颼翻葉白連盤驟雨跳珠綠是誰儂一道撥
青蘋波紋感紅衣褪開還續碧筒卷擎相促繞菱根
荇帶冷香飛逐偏是風前蝴蝶住但無人處鴛鴦浴擘
生綃悔不學丹青描橫幅

綺羅香

康熙丁丑六月舍南池上紅蓮作並頭
花賦以紀異

蕙草連葩蘭英並蒂慣在貧家盆甕

年時蕙作同心花
今夏又開並蒂

誰料今番雙頭水芝看涌交卮勸金叵羅深畫軸展玉
了又重笑莊窩半畝平池翻贏三十六陂種 谿亭容
我小住那費挑根挑葉隔江迎送卧穩風前一任冷香
吹夢愁遮了葉底難扶描不到花心齊動除非喚薛夜
來過繡成鍼七孔

又前題

揚柳陰中菰蒲雨外一柄犀株通體並著花房宛似仙

娥雙髻算只有蜀苴同心祇認得嶧桐連理又爭如水
珮風裳嫣然交影鏡香裏約開渚蘋汀蓼蕊與織鱗
隊隊鬧紅游戲第一輕舟莫放采香人樣渾不管翠蝶
衣翻生怕是綠雲風起問沙面頭白鴛鴦舊來曾見幾

題竹垞並頭蓮詞後

平湖沈登岸覃九

紅玉雙擎漢卮杯溫風別費剪刀裁定知茅屋詞人
在故向亭陰作意開

朋牋雙調綺羅香比似蘆洲遂譜強有約重過聽按

曲闌紅一舸話斜陽

水龍吟

白蓮

綠雲十里吹香輕紈翦出機中素銀塘一曲亭亭何限
露盤冰柱玉腕徐來青泥不動乍鳴柔櫓任沙鷗撲鹿
雙飛不見又何況雙棲鷺好手畫師難過倩雀吳鼠
鬚描取翠衿小鳥黃衣穉蝶添成花譜雲母屏風水晶
簾額冷光交處為秋容太淡嫣然開到小紅橋路

宣和畫譜

崔白有白蓮雙鵝圖
吳元瑜有白蓮塘圖

臨江仙引 枯荷

三十六陂遠半竿日澹一面風敲畫橋靜采菱船也都
歸幽期記紅袖滿碧筒勸舊侶全稀空留得伴愁人永
夜聽雨柴扉 江妃亭亭翠蓋水珮零落無遺剩寒蘆
折葦相映苔磯淒其看晨颺裏鴛鴦凍住了還飛漁翁
笑且香包冷飯鍼補秋衣

又 詠茄

隴上紫瓜好黛痕濃抹露實低懸趁朝日畦丁密灑冰

泉桑邊看長蒂翦纍纍紋葉底光圓筠籃滿餉白牛蕭

寺赤馬吳船 筵前生疎蜀客犀箸催下茫然笑千龐

萬粟許配芳鮮嬋娟愛輕繡染香衫色比似花妍閒無

事寫家蔬添个小蝶新蟬

芝田錄煬帝改茄子為崑崙紫瓜張文潛詩映葉乳茄濃

黛抹黃山谷銀茄詩珍蔬長蒂色勝銀又蜀人生跡不下箸又中有萬粟嚼輕冰鄭安晚詩光圓頭腦作僧看張浮休茄子頌頭附千

龐徐熙有蟬蝶茄菜圖

惜紅衣

詠薑

插架葵邊分畦蔗後日光穿漏看倚鴉鉏冰泉淺沙溜

香苗暗斲正社燕歸飛時候湖口紅掌白芽愛連船來
又 厨娘纖手輕擘柔尖聽鳴小茶白萼絲翠冷鹽豉
配能否一樣蟹胥魚鱸味勝蜜橙霜韭問凍糟酣未思
勸故人新酒

同作

嘉善魏坤禹平

瓜堰分區蔗田接岸一塍香滿障影踈踈筠簾織來
短新芽茁後聽竹外乳鳩低喚畦畔紅到柔尖割霜
根纔半 腥風翦斷縷鱸糝羹香橙也同薦寒糟配

入芳氣襲冰盃悵自故人難致客裏暗銷吟管想舍
南幾稜雨浥病花秋晚

摸魚子

蕙

記湘湖舊曾游處鴨頭新漲初醺越娃短艇烏篷小鏡
裏千絲縈髮柔櫓撥絆荇帶荷錢一樣青難割波餘影
未愛乍掐春纖盛盆宛似戢戢小魚活西泠水濯取
凝脂齊脫白銀釵股同滑蜀薑楚豉調應好不數韭芽
如蕨烟渚閣任吹老西風若个扁舟發鄉心未過想別

後三潭龜鬚雉糾冷浸幾秋月

本草春莖而未葉者名雉
蕇九十月漸麤在泥中名

蕇龜

迷仙引 水蓼花

斷續寒汀容與芳洲斜倚高岸移近山茨綠葵定得相
伴愛冷紅開簇簇映采香人面有一種名字水禽偏好
飛來無限 垂釣休教絆過雨尤堪翫蘋葉蘋花鷗莎
占取長一半試寫入千絲東絹勝寂寥幾點敗荷雪鴈

滿江紅 塞上詠葦

絕塞淒清又誰把秋聲留住斜陽外寒沙搖漾亂山無
主瑟瑟乍驚心欲碎茫茫不管愁如許伴西牕燈火坐
黃昏蕭蕭語 催一陣茅檐雨攪一片霜林杵為伊想
徧了別離情緒酒渴二更人散後月明千里鴻飛處夢
滄江添个釣魚船風吹去

醉春風

荼蘼

笑日紅偏嫩不雨青常潤卷簾一架小庭濃認認小
摘休前黃鬚綠刺最撩人鬢 轉眼殘春盡生怕繁英

褪一年花事此關心
僅僅穀雨晴時牡丹開後這番
風信

侍香金童

茉莉

暑雨初過密葉傳香遠
忍纔露芳心先掐看攏髻鬆鬆
簪一點便到黃昏卸時猶戀
怎得知午日珠江江上
讌把牆角籬根齊翦結取畫船屏四面更有人兒兩鬢
都滿

疎影

芭蕉

是誰種汝把綠天一片檐牙遮住欲折翻連乍卷還抽
有得愁心如許秋來慣與羈人伴惹多少冷風淒雨那
更堪一點疎燈繞砌暗蟲交訴待把蛛絲拭却試今
朝留與個人題句小院誰來依舊黃昏明月暫飛還去
羅衾夢斷三更後又一葉一聲低語拚今番盡翦秋陰
移種櫻花樹

臺城路

芋

瓜田幾稜

去聲

區分後青青近依禾黍趣織聲邊牽牛花

外慣滴籬根清露稍溝倚渚伴錦里先生小園秋暮野
色柴門夕陽攜客斷畦語圓荷滿陂勻翠晚來風葉
響一樣疎雨白踏泥中紫收霜後便好開筵場圃然糠
煨處聽昵昵空村夜闌兒女深盃模糊曉光聞櫟釜

柳梢青

西瓜

乞種邊庭極知風味勝似東陵虎掌黃斑瓠犀黑白蒲
鵲葱青焦烟赤日人行盼岸柳陰陰短亭蘇井寒漿
蘆簾曲几閒拂秋蠅

天香 寓生冬瓜

宿點危東田移硯北墨池秋蒂新翦仙棗輸長土酥比
淨隨意敲眠籬院寒泉溜處慣枕住沙痕一綫蒲鴿筐
中乍卸蝸牛雨餘留篆 小童抱時應顫壓冰厨短檐

茅店問客齋期好配紫茄紅莧壚頭更見熬成餌伴七
夕鍼樓果同薦轉憶鄉園疎燕舊堰

天文志瓜匏四星在危東辰郡有冬

瓠瓜

一翦梅 盆梅聯句

定武窵燒幾稜紅細斛香泥淺植春叢

魏坤

衝寒載入

小車中三尺苔枝一翦霜風

吳尊

盡圻椶毛裂紙筒

影漸橫斜態轉玲瓏

坤

花邊鄉夢兩人同放鶴洲南聽

雪亭東

吳尊

醉花間

題金曉珠水墨芙蓉

湘江水澧江水本末同姿媚露下冷花繁風裏柔枝脆

玉臺勻染地意匠應憔悴硯滴井華新墨吮香脣醉

於中好

題蔡女羅珠窵寒雀圖

疎篁幾葉搖晴翠淺暈出斷霞魚尾恁時寒色空閨裏
偶憶得瀟湘水更添凍雀黃昏睡問同夢梅花開未
一枝已遂雙栖計任雪壓風扶起

好事近

題馬湘蘭畫蘭

一十二叢蘭意態看成千百淨洗陳丹暗粉露天然真
色紅糝季布舊聞名畫也動憐惜試易管夫人款有
阿誰知得

清平樂

題水墨南瓜

牽絲引蔓野外無人管
纔見草簷花一半又早青黃堆
滿今年穀貴民飢村村剝盡榆皮
合付田翁一飽全家婦子嘻嘻

點絳脣

敬業堂早桂

金粟香濃一葉開
徧團團樹小山
題句不用傷遲暮
大火初流露脚飛寒兔
方花礎搗來仙杵
合配糖霜譜



曝書亭集卷二十八